



Senin, 11 Maret 2024

Ogen : Keluaran 18:1



ANAK JETRO



I bas kegeluhen enda, sangap me sekalak si tubuh arah keluarga si mehuli orang tuana, cukup keperluan geluhna, la atena mesui ndalani kegeluhen. Anak si ipebelin-belin i bas keluarga si dewasa, demokratis ras jadi pendukung utama bas sura-surana biasana jadi kalak si menduplikasi ntah pe ngusih biak mehuli orang tua e, jenari cenderung jadi kalak si rulih bas geluhna.

Zipora salah sada contoh diberu si sangap, kai si alokenna gundari selaku ndehara Musa, kalak pilihan Tuhan, la terlepas i bas ise ia ras biak siumbanna. Zipora eme anak Zetero. Zetero enda sekalak permakan i Midian janah meganjang ka status sosialna erkiteken ia pe sekalak pemimpin i bas kiniteken kalak Midian bas paksa e. Selaku permakan ras pemimpin Zetero teridah kalak si bijak arah ia ngidah ras mereken masuken man Musa asum idahina Musa sangana maba bangsa Israel ku taneh Kanaan.

Jadi anak kalak terpandang, bijak ras la kekurangan, labo erbahan Zipora jadi anak manja. Sanga idah Musa ia, paksana ia muat lau man asuh-asuhenna, ia ngit (rela) kidauhen ras perbulangenna, dengen ikepkepna anakna gelah selamat. Zipora paguh ras megenggeng dengen jadi nande bagepe ndehara si la ngukuri dirina saja. Zipora jadi lambang kepatuhen ras gegeh jabuna. Tuhu la kerina bagi Zipora sangapna. Tep-tep jelma la tubuh bas situasi si sempurna. Tapi sada arus inget kita sada kap Bapanta, kuasaNa ngasup mpekena-kena kita, eme Jesus Tuhanta. Bas Tuhan Jesus mbue kepentaren ras gegeh sierbahanca kita jadi nande simaba kiniulin.

